

A JE' JU'UNA', TI' U YET ACSA'ORIROB ICH U CAJAR COLOSAS. RAJI' TU TS'IBTA PABLO COLOSENSES

A Pablojo' cu ts'ibtic ti' a mac a yacsmΛnob tu yorob tu cajar Colosas

1 ¹⁻²A teno' Pablojen, yajtseq'uiren Jesucristo quire' baxuc u c'at C'uj. A teno' quet yejer in wet acsa'orir Timoteo quin t'Λniquechex in wet acsa'orirex ich u cajar Colosas quire' ta wacsex ta worex ti' Jesucristo. A tenobo' in c'atob ca' u yam techex C'uj, ic Tetex, bayiri' xan in c'atob ca' u yam techex C'uj soc mΛna' ba' ca tucriquex.

A Pablojo' cu t'Λnic C'uj ti' a mac a yacsmΛnob tu yorob

³A tenobo', quin t'Λnicob ic Tetex C'uj, a mac u Tet ic Jaj Ts'urirex Jesucristo. Rajra' quin t'Λnicob C'uj, tan in wa'aricob ti': "Bayo' C'uj", quire' ij quet acsa'orirex a ti' yΛnob ich u cajar Colosas. A baywo' quin t'Λnicob C'uj ti'. ⁴MΛ' ja wirej, quin wa'aricob "Bayo' ti' C'uj", quire' tin wu'yob bic jach taj ta wacsex ta

worex ti' Cristo Jesús. Tin wu'yob xan, bic caj a yajquintex tu cotor a wet acsa'orirex. ⁵Quire' wa ber ta yΛn bat'an u'yex u tajir u t'Λn C'uj, ra' u jach tsoyir u t'Λn C'uj, ra' ta wu'yex a ba' ca pajuquex ich C'uj, rajen ca wacsiquex ta worex, rajen ca chen yajquintiquex a wet acsa'orirex. ⁶MΛ' ja wirej, u jach tsoyir u t'Λn C'uj tu cu c'uchur ich mac cu c'axicob u cuxtarob soc mΛ' u c'at yacsicob u si'pirob. Rajen cu yacsicob tu yorob ti' C'uj, bayiri' xan, cu yajquinticob u yet acsa'orirob an ten bic techex. A rayo' ir a techexo' ta wu'yex u jach tsoyir u t'Λn C'uj caj a najtex tu jach tajir u jach tsoyir u t'Λn C'uj. ⁷Ra' ta cΛnex ti' Epafras, a mac in yajob, quij Pablo, tu quin beyajob ti' C'uj. MΛ' ja wirej, raji' cu chichiquintic a worex Epafras tu cu beyaj ti' Cristo ti' tenob tu yΛnechex. ⁸Caj urij Epafras tin wicnΛnob caj u tsicbatay in wu'yob bic ca jach yajquintiquenobex, quire' p'eri'o'onex ich u Taj'lor u Pixam C'uj.

⁹Rajen rajra' quin t'anicob C'uj techex, ra'iri' q'uinin tin wu'yob ta wacsex ta worex ti' Cristo. Quin t'anicob C'uj soc u yamtiquechex quir a najtiquex a ba' c'aso', bayiri' a ba' tsoyo', tan a yamta'rex ten u Taj'or u Pixam C'uj. ¹⁰Wa tan a najtiquex aro' quire' u Taj'or u Pixam C'uj tan u yamtiquechex, jeroj c'ucha'an a worex a manex tu tsoyir an bic u c'at ic Jaj Ts'urirex, rajra' tan a qui'quintiquex u yor ic Jaj Ts'urirex xan. Bayiri' bin a ca'ex a qui' canex C'uj. ¹¹Quin t'anicob C'uj ca' u chuquej techex u jach muc' C'uj soc c'ucha'an a worex a muc'tex a ba' cu tar techex. Soc qui' a worex ca bin a muc'tex quire' nema' biquechex. ¹²Quin t'anicob C'uj xan, ca' a canex a wa'arex ti' C'uj: "Bayo', quechex ti', ic Tetex C'uj, quire' ta qui' yajquintenob." Ma' ja wirej, a C'ujo' tu ts'laja to'onex u muc' soc u jasic a ba' yan ich ca'anano' a tu ric'saj ti' mac a C'uj yanino', a ti' yan tu sasirir C'ujo'. ¹³A C'ujo' caj u taco'onex ti' a quisino', a mac ic jach ts'urintiquex a ucho'. Quire' a ucho' quic manex ic yac'birir a quisino'. Caj u maso'onex a C'ujo' soc ij qui' ts'urintiquex u parar C'uj, quire' u jach yaj u parar a C'ujo'. ¹⁴Ma' ja wirej, Jesucristo tu taco'onex caj u jawsaj ic si'pirex quire' joc' u q'uiq'uer to'onex, u bo'orir ic si'pirex.

**U bajiri' C'uj caj u wac'as
maso'onex caj quimij Cristo
soc raji' yanino'onex**

¹⁵A jach C'ujo ma' irir ten wa mac, chen ber tu ch'aj u winquirir Jesús, jeroj tij quirex C'uj. Ma' ja

wirej, cax ma' toy beta'c yoc'ocab uch, quij, ti' toc yan a C'ujo' ch'ic uch, u beri' ti' toc yan Jesucristo. ¹⁶A Cristojo' caj u betaj tu cotor a ba' ti' yan ich ca'anano', bayiri' xan, a ti' yan tera' ich yoc'ocab. Cax a quij quiriquex, cax a ba' ma' jij quirex, raji' tu betaj. Tu cotor a maco' a yan u muc'o' ich ca'anano' a cu ts'urinta'r a ba' ti' yan ti' taro' cax a ti' yanob ich yoc'ocab, robob toc beta'b ten Cristo. Ma' ja wirej, toc beta'b ten C'uj tu cotor ba' yejer Cristo soc u rac c'ujinta'r Cristo quire' jach carem. ¹⁷Tu ch'ic chunin, cax mana' ba' beta'b, mana' ich ca'anan, mana' ich yoc'ocab, u beri' ti' yan Cristo. A Cristojo' cu ts'urinta'r ten tu cotor ba' soc ma' u jubur. ¹⁸Ra'iri' Cristo u Jaj Ts'urirob a mac a yacsmnob tu yorob, quire' raji' u jo'r, rajen a to'onexo' iro'onex u winquirir Cristo. Quire' raji' yan bat'an riq'uij tu quimirir rajen je' ic riq'uirex xan, a baywo', jach manan u muc' ti' tu cotor ba', a ti' yano'. ¹⁹Ma' ja wirej, a baywo', raji' Cristo quire' raji' jach C'uj u tajir. ²⁰Ma' ja wirej, a C'ujo' u jach c'at u yamtico'onex quire' raji' Jesucristo. Rajen tu betaj soc c'ucha'an yor tsoy yiric tu cotor mac ich yoc'ocab, bayiri' ich ca'anan. Caj rac ch'ato'onex u bajiri'e' wa ber caj joc' u q'ui'quer Cristo caj quimij ich cruz.

²¹C'aj wa techex xan, ta p'actex C'uj, ma' a c'atex a ti'o' quire' tan a manex ta c'asirex uch. Bayiri' xan, jach c'as a ba' ta tucx uch. Chen a C'ujo' tu wac'as payechex yicnan u bajiri'e'. ²²Ma' ja wirej, quimij u parar ich cruz u bo'orir a si'pirex.

A baywo' tu tsoyquintaj a pixamex soc jach tsoy, soc mΛna' u c'asir ta pixamex. MΛ' ja wirej, Λcatan tu wich C'uj, mΛna' a si'pirex, quij. ²³Baxuc je' u betic techex wa ca qui' acsiquex ta worex ti', wa ca p'eri'quintic a worex yejer, wa mΛ' u tupsic a worex ti' u jach tsoyir u t'Λn C'uj. Bayiri' xan, mΛ' tan a sutex ta pachex ti' u jach tsoyir u t'Λn C'uj a ta wu'yex. Tu cotor mac tu yubob a ray t'Λno', a ra' quin tsec'ticobo'.

A Pablojo' toc ara'b ti' quir u camsic u t'Λn C'uj ti' a yacsmΛnob tu yorob

²⁴Cax baje'rer toc c'Λra'anen ich u cajar Roma, qui' in wor, quire' tan in muc'yaj techex soc in yamtiquechex. MΛ' ja wirej, baxuc muc'yajΛjij Cristo, rajen quin muc'yaj techex, a mac a yacsmΛnob tu yorob. Quin muc'yaj jun xot' tu muc'yajΛjij Cristo xan quir in nupsic u ti'ar a yacsmΛnob tu yorob. ²⁵Bayiri' teta'ben ten C'uj quir in beyaj ti'. MΛ' ja wirej, tu c'ub in beyaj ra' quir in rac tsec'tic u t'Λn C'uj techex, bayiri' soc yer mac tu cotor xan. ²⁶A C'ujjo' tu ts'aj in beyaj a teno' uch, soc in toc aric ti' mac, a ba' a mΛ' ara'an ten C'uj ti' mΛna' mac uch. MΛna' mac yer, quire' mΛ' ara'an ti' a mac ts'a'b u tucur ten C'uj quir u tsicbarob a ba' cu yac C'uj, cax tu ch'ic chunin mΛna' mac yeri'. Chen a C'ujjo' tu toc araj ti' a mac a tu yacsob tu yorob baje'rer. Robob ts'ab u najticob ten C'uj. ²⁷MΛ' ja wirej, a C'ujjo' caj u tucraj ca' u cha'bar ij querex, a to'onex a mac a yacsmΛnob tu yorob ti' rati'. MΛ'

ja wirej, tan u yamtiquechex C'uj a mac a mΛ' u winiquirob judío. A ba' u ber jach manan tsoy quire', quij, a wet manex Cristo rajen a werex bin a ca'ex ca'ananex.

²⁸Rajen a tenobo' quin binob in tsec'ticob ti' mac tu cotor, tan in wa'aricob ti'ob ti' Cristo. Tan in chich aricob ti'ob soc mΛ' u betob a ba' c'aso'. Bayiri' tan in qui' camsicob a ti'obo' soc taj yerob u t'Λn C'uj. Tan in qui' camsicob u t'Λn C'uj soc c'ucha'an in worob in wacsicob tu cotor mac Λcatan ti' C'uj soc taj cu yacsicob tu yorob ti' Cristo. ²⁹Rajen, quin jach beyaj quire' tin c'Λmaj u chichir u muc' Cristo a mac a ti' yΛn tin pixam. Rajen quin p'isic in baj chich beyaj.

U beyaj Pablo ich u cajar Tesalónica

2 MΛ' ja wirej, a teno' in c'at a wertiquex wa quin tucriquechex quet yejer a mac a caja'an ta cajarex Laodicea, bayiri' quet yejer a mac a mΛ' yirsmΛnob. ²Quire' a teno' in c'at in chichquintic a worex soc jach manan ca pacran yajquintiquex a bΛjex, soc a baywo' a werex u t'Λn C'uj a ta wacssex ta worex raji' taj. Bayiri' xan, soc jach manan a werex Cristo, quire' a ucho', mac mΛna' yerob u t'Λn Cristo. ³A Cristojo' je' u ts'ic to'onex ca' ic najtex ba' wa quij c'atiquex ti', soc ij querex a ba' tsoy ca' ic betex. ⁴Bayiri' tan in wa'aric techex aro' soc mΛ' u tusaric techex cax tsoy u tsicbarob techex. ⁵Jach taj mΛ' ti' yΛnen tu yΛnechex baje'rer, chen tan in c'Λotiquechex. Jach qui' in wor quire' in wer taj ta wacssex ta worex,

bayiri', p'eri' a worex ich u beyaj ic Jaj Ts'urirex Jesucristo.

⁶Ra'iri' q'uin caj a c'Amex Cristo Jesús soc raji' a Jaj Ts'urirex, yan manenex tu tsoyir, quire' a wet manex Cristo baje'rer. ⁷Toc jumpuri' u ts'urint a pixamex soc a betiquex a ba' cu ya'aric techex Jesús, an ten bic caj cams'b ten yajcamsayajirob techex. Je' u nechichtar a worex a wacsiquex ta worex, rajra' tan a wa'ariquex ti' C'uj: "Bayo' C'uj", quechex ti'.

Ric'benchajij ic pixamex ten Cristo

⁸Qui' canantex a bajex soc manal' mac a cu tarob u camsi quechex t'An soc ma' a p'Atiquex bic caj a wacsex ta worex quire' a ba' cu tus camsi quechex. Ma' ja wirej, u tusarbar techex u t'Ano' quire' ma' taji', quire' a ba' cu tus camsi cob mac ra' u t'An winic, ma' u t'An C'uj. Quire' a ba' cu camsi cob ra' cu ya'aricob u nunquirob. A ray t'Ano' ma' u t'An Cristo. Robob a yajcamsayajirob, cu camsi cob u t'An ich yoc'ocab.

⁹Ma' ja wirej, a Cristojo' u bajiri' C'uj. ¹⁰Quire' ti' yan Cristo ta pixamex, rajen ma' ba'wir quir a c'Amiquex u jer. Ma' ja wirej, a Cristojo' yan u muc' rajen ra' cu ts'urinta'r ten tu cotor mac a yan u muc'ob xano' cax a te' yan ich yoc'ocab cax a yan u muc' ich a quisino'. ¹¹Quire' raji' Cristo yaninechex, jeroj ric'benchaj a pixamex quire' raji' yaninechex. Ma' ja wirej, ta p'Atex a c'asirex a ta betex ucho' quire' beta'b a pixamex ten Cristo soc ric'ben a pixamex. ¹²Ma' ja wirej, caj acsa'b

ja' ta jo'rex irechex a t'aja'an a baquerex tu japnin tunich a ten bic t'oj u baquer Cristo ich japnin tunich uch. Jeroj caj ts'oc u yacsic ja' ta jo'rex irechex ric'sa'bechex ta quimirirex an ten bic Cristo caj ric'sa'b tu quimirir xan. Ma' ja wirej, ta wacsex ta worex ti' C'uj a mac chich u muc', quire' tu ric'saj Jesús tu quimirir xan. ¹³A techexo', tu cajar Colosas, quire' quimechex acatan tu wich C'uj uch, quire' aca'an techex ta si'pirex, bayiri' xan, ma' ta quibex u t'An C'uj. Ma' jari', quire' ma' u winiquirechex judío, rajen ma' a werex a ba' cu ya'aric u t'An Moisés. Chen baje'rer, toc ric'sa'bechex quir a cuxtarex yejer Cristo, a mac tu jawsaj a si'pirex baje'rer. ¹⁴A C'ujjo', ma' tu chen jawsaj ic si'pirex, tu rac ruc'saj u t'An Moisés, a cu ta'quic ic jo'rex ti' ic si'pirex. A ra' u q'uinin caj quinsa'b Jesús ich cruz, ra'iri' u q'uinin toc ruc'sa'b u t'An Moisés. ¹⁵Bare' caj quimij Jesús ich cruz, a ray u q'uinino', caj rubsa'b u muc' a quisino' yejer yet quisinin. Quire' quimij Jesús ich cruz, C'uj tu yesaj, tu toc ch'esaj u muc' quisin, quire' u parar C'uj c'ucha'an yor ti' a quisino'. Rajen, ma' u c'uchur yor to'onex a quisino'.

Ca' a caxtex a ba' tsoy tu t'An C'uj

¹⁶Rajen, ma' a ch'ic suraquirex wa mac cu ra'quic a pachex, cax a ba' ca jantiquex, cax a ba' ca wuc'urex, cax wa ma' a canantiquex u q'uinin tu cu qui' janlanob wa ra' ic na'o', cax wa ra' yaxquino', cax wa ra' u q'uinin tu cu je'rar u winiquirob judío. ¹⁷Aro' a tin chen araj techex,

cu chen camstico'onex, yan toy a cu bin tar ca' bin c'uchuc tu q'uinin soc a werex a jach tajo', a rayo' chen u yochir ca wiriquex. Rajen aro' ma' noji', quire' caj tarij Cristo ich yoc'ocab jeroj raji' u bajiri' ic Jaj Ts'urirex. ¹⁸Ma'na' mac yan aric techex wa ma' tsoy bic tabar ca c'ujintiquex C'uj, quire' tan a wesiquex wa ma' caremechex. Tan u chich aricob techex wa ca' a c'ujintiquex u yajmasirob u t'an C'uj. Robob, cu tusaricob tu tu waya'c'tajob C'uj, rajen tsoy tu t'an. Ma' a quibiquex ti'ob quire' cu tusaricob jach caremob. C'as cu tucricob rajen jot aro'. ¹⁹Robob cu tus tucricob ij quet acsa'orirex, cax ma' tan u sayarob tu pach a ba' cu camstico'onex Cristo, a mac ic Jaj Ts'urirex, quire' raji' ic jo'rex. Ma' ja wirej, raji' cu chichquintic u muc'ob tu cotor in winquirirob. Rajen, c'ucha'an ij corex ic beyajex ti' Cristo, a baywo' je' ic tsoytarex an ten bic C'uj u c'at u tsoyquintico'onex. ²⁰A techexo' tu cajar Colosas, a werex caj quimij Cristo quet quimechex xan. Rajen, ba'wir ca cha'iquex u jer u chich aricob techex ca' a c'ujintiquex C'uj an ten bic u tus ajcamsayajirob u t'an C'uj u c'atob. ²¹Rajen ma' a quibiquex a cu ya'aricob: "Ma' a tariquex a je'ra', quij. Ma' a chi'iquex aro', quij, ma' a tumtiquex ara xano'." ²²Ma' ja wirej, aro' chen u bajiri'ob u t'anob. Aro' jari' u t'an winic tan a quibiquex, ma' u t'an C'uji'. A ucho', ma' no'j quic chen c'laniquex quire' ic jantiquex. ²³A ba' cu chich aricob techex ca' a canex yejer a ba' cu camsiqechex cu tus

tucricob jach manan tsoy. Rajen cu tus c'ujinticob a ba'quiri' u bajiri'ob tu tucrajob. Ma' ja wirej, cu tus tucricob ma' necaremob tu cu tus c'ujinticob yajmasirob u t'an C'uj. Tan u ts'a'bar u muc'yajob u wac'as winquirir quire' cu tus tucricob jach tsoy tu wich C'uj aro'. Cax cu beticob aro' ma' ju c'uchur yorob u p'aticob a ba' c'asir cu pachticob tu yorob xan.

3 Ma' ja wirej, wa ber caj ric'sa'b Jesús ten C'uj uch quir u cuxtar quet bayiri' ric'sa'bechex xan, quir a cuxtarex soc a manex tu tsoyir. Rajen ca' a calt'ex a ba' tsoy tu t'an Cristo, a raji' ti' yan ich u noj C'uj quire' raji' jach yan u muc' C'uj a caremo'. ²Toc ts'ajex a tucurex ti' a ba' u c'at C'uj. Rajra' ca' tucriquex a ti'o' soc ma' a chen calxtiquex a ba' yan te' ich yoc'ocaba'. ³Quire' a techexo' quimenechex ti' a ba' oc a ts'urintajex uch, a tu pay a si'pirex uch. Toc yan a cuxtarex munt q'uin a tan u cananta'r ten Cristo techex baje'rere'. ⁴Ca' bin uruc Cristo a ra' cu canantic, ij cuxtarex munt q'uin, a ra' cu bin u ts'ic to'onex. A ra' u q'uinino', Jesús cu bin esbir ten C'uj ich u sasirir quet yejero'onex a mac a yacsmnob tu yorob ti' Cristo.

**A ba' tic ts'urintaj uch yejer
a ba' tic ts'urinta baje'rer**

⁵Rajen, in wet acsa'orirex, toc jumpuri' ca' a p'at'ex a manex ich a c'asirex a ti' yan a tera' ich yoc'ocab a ca pachtiquex ta winquirirex. Jot, quij, ma' a man a wirej a ma' u mami', bayiri' xan a ma' man a wirej a ma' a raq'ui', quij. Jot, ma' a muc a payej xquic ich u rac'ob.

Jot, quij, mΛ' a pachtic xquic ta wor, bayiri' mΛ' a pachtic xib ta wor soc mΛ' a bin yejer. Jot, quij, mΛ' a pachtic u ba'tac soc tech yΛnin ch'ic ya'ab. MΛ' ja wirej, a mac a cu pachtic u ba'tac soc raji' yΛnin ya'ab, raji' quet yejer a cu tus c'ujjinticob u tus c'uj. ⁶MΛ' ja wirej, a mac a ti' toy cu manob ich a ray u c'asiro', ca' bin c'uchuc tu q'uinin u xur t'Λn, bin u ca' ts'a'bar u muc'yaj ten C'uj a ti'obo'. ⁷C'aj techex, a ucho' ta wacsex a si'pirex irechex a wet cajarex, ra' u q'uinin ta ts'urintex a c'asiro' a tin ts'ibtaj techex baje'rer. ⁸Quire' baje'rer, ts'oc a pɣyiquex a si'pirex an ten bic a ucho', rajen cΛnex a wet acsΛ'orirex xan, tan a p'Λtiquex a c'aso' baje'rer. Rajen, ca' a p'Λtex a je'ra', p'Λtex a p'ujurex. P'Λtex a ts'ictarex. P'Λtex a p'actex ta worex a rac'ob. P'Λt a chejtiquex a rac'ob. P'Λt a tsicbarex ti' c'as. ⁹Toc rΛc p'Λtex a pacran tusex, quire' ta toc rΛc p'Λtex a ba' c'asir nani a pɣyiquex uch. ¹⁰MΛ' ja wirej, a c'ΛmΛnex a ric'ben cuxtarex baje'rer, rajen tan a nequi' cΛniquex C'uj soc ca p'eri'quintiquex a tucurex yejer C'uj a mac a tu betajechexo'. ¹¹Rajen cax mΛ' u winiquirechex judío, cax wa ju winiquirechex judío, cax wa ta quibex a ts'iriquex a wot'erech an ten nani u beticob u winiquirob judío, cax wa mΛ' ta quibex a ts'iriquex a wot'erech an ten nani u beticob u winiquirob judío, cax wa ja werex ju'un, cax wa mΛ' a werex ju'un, cax wa ju c'urewechex mac, cax wa mΛ' u c'urewechex mac, a ba'quir toc jach nojo' wa p'eri'o'onex yejer Cristo quire' raji' aca'an tic pixamex.

¹²A techexo' u winiquirechex C'uj. Quire' tu yajquintechech C'uj rajen tu tetechech soc raji' yΛninechex. Quire' tan a cΛniquex C'uj a baje'rera', ca' a yajquintex a rac'obex, quire' ca' a yamtex a ti'obo', mΛ' ts'utechex yejerob a wet acsΛ'orirexi'. Ca' a toc tucurex a wet acsΛ'orirex an bic tsoyo', mΛ' a cΛxtiquex a ba'quiri' a bajiri'ex a c'atexe'. Ca' a cΛnex nemΛ' biquechex yejer a mac a cu p'usiquexob, quire' mΛ' ja nunquicobex ti'. ¹³YΛn muc'tex u choquintic a worex a wet acsΛ'orirex. Cax wa tu choquint a worex a wet acsΛ'orirex, yΛn jawsex u si'pir a ti'o', cax wa ba'quir u choquintic a worex an ten bic toc jawsa'b a si'pirex ten ic Jaj Ts'urirex Jesús. YΛn toc jawsex u si'pir a wet acsΛ'orirex xan. ¹⁴Quire' a werex a ba' jach manan no'jo' wa ca yajquintiquex a wet acsΛ'orirex. Rajen cu p'eri'quinticob yorob u yet acsΛ'orirob quire' u yajob u baj rajen quet yorob yejer yet acsΛ'orirob. ¹⁵MΛ' ja wirej, a Cristojo' tu pɣyechex u bajiri' soc a p'eri'quintic a worex yejer Cristo. Rajen ca' a pachtex a p'eri'quintic a worex yejer a wet acsΛ'orirex. MΛ' a betiquex a ba'quir a cu joc'sic yor a wet acsΛ'orirex.

¹⁶A techexo', ca' a cha'ex u ts'urintic u t'Λn C'uj a pixamex soc c'ucha'an a worex a pacran camsiquex a bajex xan, soc a pacran chich t'Λniquex a bajex, quij, a baywo' je' a c'ayiquex u c'ay C'uj, soc a wa'ariquex: "Bayo' ti' C'uj." ¹⁷Tu cotor a ba' beyajir ca betiquex, cax tu ca ts'icbarex, cax

tu ca beyajex ca' a wesex ti' mac soc yer mac rajil' yΛninechex wa a Jaj Ts'urirex Jesucristo. Rajil' je' u yamtiquechex soc a wΛc'Λs ariquex: "Bayo' ti' ic Tetex C'uj."

**Quire' tij cacsex tij corex ti'
Cristo ca' ij quibex a je' t'Λna'**

¹⁸A mac a ch'a'b raq'uinbir ten xib, a xquico' ca' u quib u t'Λn u mam, quire' tu yacsaj tu yor ti' Cristo.

¹⁹A mac maminta'b ten xquic ca' u yajquint u rac', ca' u qui' cΛnantej soc mΛ' u ts'ictar ti' u rac'. ²⁰Arej ti' a pararex, soc u quibob u t'Λn u tet yejer u nΛ'ob soc u qui'quinticob yor C'uj. Rajra' ca' u quibob u t'Λn u tetob, quire' tu yacsob tu yorob ti' Cristo. ²¹U tetechex a pararex, mΛ' a yΛn ts'iquintiquex a pararex soc mΛ' a tupsiquex yorob a pararex.

²²A mac c'urewinta'b ten u jach ts'urir. Rajra' ca' a quibex u t'Λn a jach ts'urirex. MΛ' a chen quibiquex tu q'uinin tu cu tar yir a beyajex soc a wu'yiquex ya'aric techex a jach ts'urirex: "Jach tsoyechex quire' ca beyajex." Ca' a qui' beyanΛquechex taj quire' ca sΛjtiquex C'uj. ²³Tu cotor a ba' ca betiquex, qui' beyanenex quire' tan a qui' beyajex ti' C'uj, cax ti' a jach ts'urirex xan ca beyajex. ²⁴YΛn c'aj techex a Jaj Ts'urirex je' u bo'otiquechex u bo'orir a c'Λbex wa ja woquex xan. Je' a c'Λmiquex a cuxtarex munt q'uin ti' Cristo xan, quire' rajil' a Jaj Ts'urirex tu ca beyajex ti' xan. ²⁵A C'ujo' quet cu yiric tu cotor mac, quire' cu bo'otic u bo'orir mac, a ba' cu jaric, cax wa mΛ' qui' beyanΛji' mΛ' ju qui' bo'tar. Wa tsoy qui' beyanΛjij cu qui' bo'ta'r.

4 A techexo', a cu jach ts'urintechex a c'urewex, ca' a betex tsoy ti' a c'urewex. MΛ' coyen a q'ueyiquex a ti'obo', chen taj a c'Λniquex a ti'obo'. C'aj techex ti' yΛn a ts'urirex xani', quire' ta wacsex ta worex ti'. Rajil' a ti' yΛno' ich ca'anano'. ²Tu ca bin a t'Λnex C'uj, p'isex a bΛjex a t'Λnex a ti'o', soc mΛ' u tar a tucurex tu' ca t'Λniquex C'uj. Arex ti' C'uj: "Bayo'", wa ber ca t'Λniquex a ti'o'. ³Ra' u q'uinin ca bin a t'Λnex C'uj, t'Λnex C'uj tenob soc mΛna' mac cu mΛ'quej in berob tu quin tsec'ticob u t'Λn C'uj. T'Λnex C'uj soc u qui' c'Λmiquenob quir in tsicbarob ti'ob Cristo, a mac tarij quir u jawsic u si'pirob soc c'ucha'an yorob u binob ca'anan. MΛ' ja wirej, a ucho' mΛna' mac yer aro', rajen tu chucajenob u winiquirob judío caj u c'Λrajenob uch. ⁴T'Λnex C'uj xan, soc ca' bin in tsec'tej u t'Λn C'uj, soc u qui' najticob soc yerob bic tabar quin tsec'tic. ⁵Qui' cΛnantex a bΛjex bic tabar a t'Λniquex a mac a mΛ' yerob C'uj, quire' mΛ' ya'ab u q'uinin quir u yu'ur Cristo, rajen t'Λnex a ti'obo' ca' u yubob Cristo. ⁶Ca' bin a t'Λnex mac, qui' ca t'Λniquex soc u tucricob jach tsoy a t'Λniquex. Bayiri' xan, soc a werex bic tabar a nunquiquex u t'Λnob a mac a mΛ' yerob C'uj soc u yacsicob tu yorob xan.

Pablo cu rac t'Λnic u yet acsΛ'orirob

⁷Ca' bin c'uchuc tu yΛnechex ij quet acsΛ'orirex, u c'aba' Tíquico, aro' bin u ca' tsicbar techex a ba' in ber a teno'. A Tíquicojo', in jach yaj, quire' caj u qui' yamten, mΛ'

ju p'at u beyaj hasta tu ts'ocs u beyaj a ti'o'. Quet caj beyanɔjen yejer u beyaj in Jaj Ts'urob. ⁸A mac a quin tuchi'tic techex, bin u ca' chichquint a worex soc a werex bic tabaren tu maɔa'anen tu cu ma'cɔr winicob, rajen tan in tuchi'tic techex Tíquico. ⁹Yet tar Onésimo ca' bin tac Tíquico tu yɔnechex. Raji' in jach yaj xan, tan u qui' beyaj ti' ic Jaj Ts'urirex. Aro' ti' cɔja'an ta cajarex uch. A ba' u ber a tera' ich u cajar Roma ti' a wet acsɔ'orirex, je' u tsicɔaticob ti' techex soc a wu'yiquex a ba' u berob ich u cajar Roma.

¹⁰Bayiri' in wet c'ɔra'an winic, u c'aba' Aristarco cu ya'aric ca' in t'ɔnechex. Bayiri' xan, u yum Bernabé, u c'aba' Marcos, cu t'ɔniquechex. A ucho' raji' caj in ts'ibtajex ju'un soc a qui' acsiquex ca' bin c'uchuc tu yɔnechex.

¹¹A je'ra' Jesús u c'aba', cu t'ɔniquechex. Raji' ca'tur u c'aba', u jer u c'aba' Justo. Robob jariri' ich in wet winiquirob judío a tu yacsob tu yorob. A je' tresa' cu yamtiquenob tan u tsec'ticob u t'ɔn C'uj. Robob tu chichquintob in wor. ¹²Jeroj cu t'ɔniquechex Epafras. Raji' cɔja'an ta cajarex uch. Bayiri' xan, cu beyaj ti' Cristo. A Epafraso', rajra' cu t'ɔnic C'uj techex. Cu muc'yaj tu cu t'ɔnic C'uj techex. Rajra' tan u t'ɔnic C'uj soc wa ba' a ber techexo' soc ma' a p'ɔtiquex

u t'ɔn C'uj. Cu t'ɔnic C'uj soc a manex tu tsoyir soc a betiquex a ba' tsoy tu t'ɔn C'uj. ¹³Ma' ja wirej, a teno' tin wiraj tin wich bic muc'yajɔjij tu cu t'ɔnic C'uj techex. Ma' chen ti' techex cu t'ɔnic C'uj, cu t'ɔnic C'uj a mac a cɔja'an tu cajar Laodicea, bayiri' xan cu t'ɔnic C'uj ti' a mac a cɔja'ano' tu cajar Hierápolis. ¹⁴A Lucaso' cu t'ɔniquechex, raji' ic jach yajo'. A Lucaso' raji' cu ts'ɔquic maco', bayiri' Demas cu t'ɔniquechex. ¹⁵T'ɔnex ten ij quet acsɔ'orirex, a ti' yɔnob tu cajar Laodicea. Bayiri' xan, t'ɔnex a mac a cu tar u much'quintob u bɔj quir yubicob u t'ɔn C'uj tu yatoch Ninfas. T'ɔnex Ninfas, a mac xquic xan, ij quet acsɔ'orirex. ¹⁶Ca' bin ts'ocac a xaquiquex a je' ju'una', ca' a tuchi'tex ti' a yacsmanob tu yorob tu cajar Laodicea soc u xaquicob xan. Bayiri' xan, ca' a xaquex u ju'un a tin ts'ibtaj ti' a yacsmanob tu yorob ich u cajar Laodicea. Je' u ca' puric techex xan. ¹⁷Arex ti' Arquipo: "Ca' a ts'ocs a beyaj Arquipo a ta c'ɔmajech ti' ic Jaj Ts'urirex uch." Baxuc ca' a wa'arex ti' ich u cajar Colosas.

¹⁸A teno' Pablojen, tin ts'ib techex quir in t'ɔniquechex. Qui' c'aj techex wa ti' yɔnen tu cu ma'cɔr winicob. A teno' in c'at ca' u qui' cɔnan techex C'uj, jeroj ts'oquij, quij Pablo.